

Nd.

317. Frumvarp til laga

um sameining Selfosbyggðar í eitt hreppsfélag.

Frá heilbrigðis- og félagsmálanefnd.

1. gr.

Selfosbyggð í Árnessýslu, sem vaxið hefur upp á mótum þriggja hreppsfélaga við Ölfusá, skal verða sérstakt sveitarfélag, er nefnist Selfosshreppur. Í hinum nýja hreppi eru þessar jarðir: Selfoss og Hagi ásamt Bjarkarspildu úr Sandvíkurhreppi, Árbær og Hellir ásamt Fossnesi úr Ölfushreppi og sneið af Laugardælandi í Hraungerðishreppi, er markast af beinni línu frá Virkisvörðu til hæsta klettsins á nyrzta ferjuholti í Hellislandi. Að öðru leyti eru landamerki jarða þeirra, sem að ofan eru taldar, hreppamörk hins nýja Selfosshrepps.

2. gr.

Selfosshreppur tekur að sér framfærslu allra þeirra, er öðlzt hafa eða öðlzt kunna framfærslurétt á svæði því, er hreppurinn tekur yfir.

3. gr.

Skipti milli Selfosshrepps og Sandvíkurhrepps á sameiginlegum eignum og skuldum núverandi Sandvíkurhrepps skal fara fram samkvæmt því, sem fyrir er mælt í sveitarstjórnarlögum.

Ölfushreppi og Hraungerðishreppi greiðir Selfosshreppur bætur eftir mati fyrir missi tekna af þeim landsvæðum, sem frá þeim hreppum eru tekin og lögð til hins nýja Selfosshrepps.

4. gr.

Nú næst ekki samkomulag milli hreppsnefndar Selfosshrepps og hreppsnefndanna í Ölfushreppi og Hraungerðishreppi um bætur þær, er í 3. gr. getur, eða önnur ákvæði, er skiptin varða, og skal þá leggja ágreininginn í gerð. Skulu 5 menn skipa gerðardóminn, og eru tveir tilnefndir af hreppsnefnd Selfosshrepps, en tveir af hreppsnefndunum í hvorum hinna hreppanna, Ölfushreppi og Hraungerðishreppi, eftir því sem þeir hreppar eiga hlut að gerðinni. Fimmta manni í gerðardómnum skipar sýslumaður Árnessýslu, og er sá forseti dómsins.

Ágreiningsmálum milli Selfosshrepps og Sandvíkurhrepps, er skiptin varða, má og skjóta til gerðardóms þessa, en þá tilnefnir hreppsnefnd Sandvíkurhrepps tvo menn af sinni hálfu að taka sæti í dómnum.

Úrskurður gerðardómsins er bindandi fyrir þá aðila, sem að honum standa, og verður honum ekki áfrýjað.

5. gr.

Lög þessi öðlzt gildi 1. janúar 1946, og skal skipti öll og skaðabætur miða við þann tíma, Allir, sem búsettir eru 1. janúar 1946 á svæði því, sem hinn nýi Selfosshreppur tekur yfir, öðlzt þar samtímis kosningarrétt í sveitarstjórnarmálum, enda tekur Selfosshreppur á sig allar skyldur gagnvart þeim mönnum, sem lög-mætu heimilisfangi fylgja.

Greinargerð.

Frumvarpið er flutt eftir ósk félagmálaráðuneytisins, og hafa nefndarmenn óbundnar hendur um breytingar, er fram kunna að koma.

Frumvarpinu fylgdi svo hljóðandi greinargerð:

Byggðin á Selfossi við Ölfusá á sér nokkra sögu. Skilyrði fyrir aukna byggð voru ekki fyrir hendi, fyrr en brúin var byggð 1891. Hún var stórvirki, og stórhugur héraðsbúa óx við það mannvirki. Hér sköpuðust krossgötur og umferðastraumur, og hér hlaut að verða miðstöð verzlunar og samgangna á hinu víðlenda, gagnauðuga og fagra Suðurlandsundirlendi.

Þó komst enginn skriður á byggingarframkvæmdir hér fyrr en Mjólkurbú Flóamanna (MBF) tók til starfa undir árslok 1929 og Kaupfélag Árnesinga (K. Á.) hóf starfsemi sína á öndverðu ári 1931. Á árunum 1931 til 1934 voru byggð 20 hús á Selfossi í Sandvíkurhreppi. Byggð voru 10 hús að meðaltali árlega árin 1942—44, en nú (1945) eru 27 hús í smíðum, og verða flest þeirra fullgerð um áramót. Þar af eru 3 stórhýsi að okkar hætti: barnaskóli, læknishústaður (bæði fullgerð) og verzlunarhús K. Á. (í smíðum). Samkv. nýteknu manntali eru 510 heimilisfastir hér. Hefur aukizt um 120 frá 1944.

Norðan Ölfusár í Ölfushreppi er ákjósanlegt byggingar- og nytjaland. Þar norður frá brúarsporðinum, á svo kölluðu Langanesi, hafa nokkrir starfsmenn K. Á. reist sér íbúðarhús á styrjaldarárunum. Eru þar nú 12 hús og 50—60 íbúar. Þá hefur Sláturfélag Suðurlands keypt í sumar stórar byggingarlóðir þar og kvað ætla að reisa þar sláturhús og gera tilheyrandi mannvirki á næsta vori.

Í hverfinu hjá MBF voru aðeins 3 hús, þar til styrjöldin hófst. Á síðustu árum hafa verið reist þar 5 íbúðarhús. Íbúar eru nú 60—65.

Nú vonast allir Sunnlendingar eftir rafveitu frá Sogsvirkjuninni á sumri komanda. Má því ætla, að uppi verði fótur og fit og ekkert lát á byggingar- og iðnaðarframkvæmdum á næstu árum.

Eins og lýst hefur verið, er aðalbyggðin á Selfossi í Sandvíkurhreppi. Þar eru allar verzlunirnar, veitingahús, samkomu- og kvikmyndahús og barnaskóli. Þar hefur allur þorri íbúa þessara þriggja byggðahverfa atvinnu sína og lífsframsærslu. Þannig sækja allir íbúarnir á Langanesi í Ölfushreppi atvinnu sína til núverandi Sandvíkurhrepps, enda fær Sandvíkurhreppur að sjálfsgöðu $\frac{2}{3}$ útsvara þeirra frá Ölfushreppi. Í hverfinu hjá MBF búa nokkrir menn, sem stunda atvinnu hjá K. Á. og á hinn bóginn búa margir starfsmenn MBF í Sandvíkurhreppi.

Þessi þrjú byggðahverfi eru þegar tengd atvinnulega, félagslega og menningarlega. Hagsmunir þeirra eru sameiginlegir og óaðskiljanlegir, og mun svo verða um alla framtíð. En þessa fá þau eigi notið til fulls. Meinendur eru móðurhrepparnir (Ölfus- og Hraung.hr.).

Það verður ljósara með hverju ári, sem liður, að hverfi þessi hljóta að sameinast og ganga í sérstakt sveitarfélag. Sú þróun er augljós og hröð. En eins og sakir standa, hefur hverfið á Selfossi í Sandvíkurhreppi eitt rétt til að krefjast skilnaðar við sinn hrepp samkvæmt 4. gr. sveitarstj.l., en hin tvö ekki sökum mannfæðar. Fyrir þessar sakir, meðal annars, er sameiningarfrumvarpið fram komið.

Þar sem þróun til sameiningar er augljós og hröð og frestun mundi torvelda viðskilnað hverfanna við móðurhreppana, þá verður það að teljast sjálfsgöð fyrirbyggja að koma sameiningunni á sem fyrst og tryggja þessu verðandi sveitarfélagi nægilegt land um fyrirsjáanlega framtíð. Framtíðarlandið þarf að vera stórt og gott byggingar- og nytjaland. Eigi orkar tvímælis, að Árbær og Hellir uppfylla bezt þessi skilyrði. Nauðsynlegt er og að fá þá sneið af Laugardælalandi, sem farið er fram á í frumvarpinu.

Þess má geta, að eigendur Árbæjar og Hellis eru allir, að einum undanskildum, búsettir á Selfossi í Sandvíkurhreppi. Er vitað, að þeir kjósa fremur að greiða út-

svör og önnur sveitargjöld til síns hrepps en Ölfushrepps. K. Á. er eigandi Laugar-
dælatorfunnar.

Af málum þeim, sem ættu að vera sameiginleg í þessum hverfum, en eru það
ekki, skal nefna:

1. Skipulagsmál. Skipulag og byggingarsamþykkt er til fyrir Selfoss í Sandvíkur-
hreppi, en byggðin í Helli og við MBF er án skipulags. Er aðkallandi nauðsyn
að skipuleggja nefnd hverfi. Byggingar án skipulags eru jafnan hin mesta
hryggðarmynd.
2. Heilbrigðismál. Nauðsynlegt er, að heilbrigðissamþykkt sé sameiginleg, en svo
er ekki. Samþykkt um holræsagerð er á Selfossi, en hún tekur ekki til hinna
hverfanna. Þess væri þó þörf, því að frá-ræsla MBF er að minnsta kosti vitaverð.
3. Brunamál. Brunavarnir eru taldar í góðu lagi á Selfossi. Njóta hinir þess, þótt
þeir hafi ekkert til þeirra lagt.
4. Kirkjumál. Íbúar norðan Ölfusár eru í Kotstrandarsókn, en hinir í Laugar-
dælasókn. Sækja þeir kirkju með Selfossbyggjum, en greiða kirkjugjöld sín
til Kotstrandar.

Flaira mætti telja þessu líkt, svo sem rafveitumál, ræktunarmál, lögreglumál,
framfærslumál o. fl.

Um upptök þessa máls og meðferð til þessa er þetta að segja: Í öndverðum marz
s. l. barst hreppsnefnd Sandvíkurhrepps yfirlýsing svo hljóðandi, dags. 4. marz s. l.,
frá búendum í nýlendunni á Langanesi norðan Ölfusár í Ölfushreppi:

„Við undirritaðir, búendur í nýlendunni norðan Ölfusár, í landi Hellis í Ölfus-
hreppi, lýsum hér með yfir, að við óskum þess eindregið að ganga í sveitarfélag
með Selfossbyggjum.

Selfossi, 4. marz 1945.

Þorsteinn Bjarnason, Sigurður Þorbjörnsson, Karl Eiríksson, Adam Hoffritz,
Þórmundur Guðsteinsson, Halldór Árnason, Þórmundur Guðmundsson.“

Þann 11. marz s. l. kom hreppsnefndinni einnig í hendur eftirfarandi beiðni,
dags. 11. s. m. frá búendum í hverfinu við Mjólkurbú Flóamanna:

„Við undirritaðir búendur (húseigendur og húsráðendur) í hverfinu við
Mjólkurbú Flóamanna í Hraungerðishreppi lýsum hér með yfir, að við óskum þess
einum rómi að ganga í bæjarfélag með Selfossbyggjum.

Selfossi, 11. marz 1945.

Stefán Björnsson, Sigurður Ólafsson, Guðni Guðjónsson, Sigurður I. Sigurðsson,
Andrés Hallmundsson, Benedikt Franklínsson.“

Samkv. þessu fara búendur í byggðahverfunum á nefndum stöðum, í Ölfus-
hreppi og Hraungerðishreppi, fram á það að ganga í sveitarfélag með Selfoss-
byggjum.

Þessar málaleitanir voru síðan bornar upp og ræddar á almennum hrepps-
fundi í Sandvíkurhreppi og um þær gerð svofelld ályktun:

„Almennur hreppsfundur í Sandvíkurhreppi, haldinn að Selfossi 16. apríl 1945,
samþykkir að fela hreppsnefndinni að vinna að sameiningu hinna þriggja byggða-
hverfa, sem eru að vaxa upp við Selfoss, í eitt sveitarfélag.

Fundurinn telur, að sérstaklega beri að stefna að því að fá byggðahverfi þessi
ásamt hæfilegu framtíðarumhverfi gerð að sérstöku bæjarfélagi með kaupstaðar-
réttindum. Verði í því sambandi sérstaklega athugað, hvort ekki sé rétt, að kaup-
staðarsvæðið nái yfir allan núverandi Sandvíkurhrepp.“

Þá gerðist það, að hreppsnefndir Sandvíkurhrepps og Ölfushrepps komu saman
á fund í Hveragerði 29. maí s. l. og ræddu um áður nefnda málaleitun búendanna

í Langanesi í Ölfushreppi og þá ósk hrepps. Sandvíkurhrepps að fá jarðirnar Árbæ og Helli lagðar undir Sandvíkurhrepp. Á þeim fundi gerðist þetta:

„Þriðjudag 29. maí 1945 var haldinn í Hveragerði sameiginl. fundur hreppsnefnda Ölfushrepps og Sandvíkurhrepps í Árnessýslu. Mættir voru allir hreppsnefndarmenn beggja hreppanna ásamt herra Jónasi Guðmundssyni, eftirlitsmanni bæjar- og sveitarfélaga.

Oddviti Sandvíkurhrepps setti fundinn og stjórnaði honum og kvaddi Sig. Óla Ólafsson til að rita fundargerð.

Tilfni fundarins var ályktun sú, sem samþykkt var á almennum hreppsfundi í Sandvíkurhreppi 16. apríl s. á., þar sem hreppsnefndinni var meðal annars falið að vinna að sameiningu hinna þriggja byggðahverfa við Selfoss. Oddviti Sandvíkurhrepps hóf umræður og skýrði málið fyrir fundarmönnum. Las hann yfirlýsingu frá íbúum byggðahverfis þess, er risið hefur upp andspænis Selfossi, utan Ölfusár, þar sem þeir óska eftir að ganga í sveitarfélag með Selfossbyggjum.

Til máls tóku, auk frummælenda, Jónas Guðmundsson, Halldór Gunnlaugsson, Gottskálk Gissurarson, Karl Þorláksson og Herm. Eyjólfsson.

Niðurstaða umræðnanna varð sú, að hreppsnefnd Ölfushrepps gefur kost á frekari umræðum um málið, enda sé þess leitað bréflaga af hrepps. Sandvíkurhrepps.

Fundargerð lesin og samþykkt. Fundi slitið.“

Í framhaldi af þessu fóru svo eftirfarandi bréf milli oddvita Sandvíkurhrepps og oddvita Ölfushrepps:

Ég skirskota til sameiginlegs fundar hreppsnefnda Sandvíkurhrepps og Ölfushrepps þann 29. þ. m., þar sem hreppsnefnd Ölfushrepps gaf kost á frekari umræðum um þessi tvö atriði:

- I. Ósk íbúa Ölfushrepps á Langanesi í Ölfusi, í Hellislandi, um að ganga í bæjarfélag með Selfossbyggjum.
- II. Málaleitun hreppsnefndar Sandvíkurhrepps um að hefja þegar samninga við hreppsnefnd Ölfushrepps um að leggja jarðirnar Árbæ og Helli í Ölfushreppi undir lögsögu Sandvíkurhrepps.

Óska ég þess, að þér, herra oddviti, berið þetta erindi upp í hreppsnefnd Ölfushrepps við fyrsta þóknanlegt tækifæri og látið mig síðan vita, hvenær hreppsnefnd Sandvíkurhrepps má hitta ykkur að máli um þessa málaleitun.

Björn Sigurbjarnarson.

Til oddvita Ölfushrepps.

Oddviti Ölfushrepps, Gerðakoti, 5/7 1945.

Samkvæmt ósk yðar, herra oddviti, hef ég lagt fyrir hreppsnefndina erindi yðar, dags. 3/7 s. l., þar sem farið er fram á, að jarðirnar Árbær og Hellir leggist undir lögsögu Sandvíkurhrepps.

Hreppsnefndin tók þá ályktun að leggja málið fyrir almennan hreppsfund, sem halda átti 20. júní. Eftir nokkrar umræður á þeim fundi var samþykkt (sic) svoláttandi tillaga: „Almennur hreppsfundur Ölfushrepps haldinn í Hveragerði 20. júní 1945 lýsir því eindregið yfir, að hann er með öllu mótfallinn að láta af hendi nokkurt land hreppsins utan Ölfusár til annarra hreppsfélaga, og skorar á hreppsnefndina að vera vel á verði í þessum málum fyrir hönd hreppsins.“

Þar sem hreppsnefndin telur sig bundna við framanritaða fundarályktun, telur hún frekari umræður um málið ástæðulausar.

Virðingarfyllt.

Hermann Eyjólfsson.

Til oddvita Sandvíkurhrepps, Selfossi.

Með bréfi, dags. 3. júní s. l., óskaði hreppsn. Sandvíkurhrepps viðræðna við hreppsn. Hraungerðishrepps um áður nefnda yfirlýsingu búenda hjá MBF í Hraungerðishreppi. Eftirrit bréfs oddvítans í Hraungerðishreppi fer hér á eftir:

Oddvitinn í Hraungerðishreppi, 20. júní 1945.

Út af bréfi oddvita Sandvíkurhrepps frá 3. þ. m. um ósk um viðræðufund milli hreppsnefnda Hraungerðis og Sandvíkurhrepps í sambandi við yfirlýsingu frá húseigendum við MBF í Hraungerðishreppi, sé ég ekki ástæðu til að stofna til umræðufundar.

Viðkomandi menn geta talað um það við sína eigin hreppsnefnd. Það hafa þeir ekki gert.

Bæjarfélag er ekki fyrir hendi á Selfossi, og hreppsnefndin hér hefur ekki eignarrétt á landi því, sem liggur við hreppamörkin.

Gísli Jónsson.

Til oddvita Sandvíkurhrepps.

Samkv. þessum svarbréfum telja oddvitarnir í nefndum hreppum frekari umræður ástæðulausar, og „ekki ástæðu til að stofna til umræðufundar“, eins og annar orðar það.

Þar sem hreppsn. Ölfushr. og hreppsn. Hraungerðishr. höfðu báðar færzt undan að ræða við hreppsn. Sandvíkurhr. um sameiningu byggðahverfanna við Selfoss og um landauka til handa nýju sveitarfélagi, þá var leiðin til samkomulags milli hreppsn. Sandvíkurhr. annars vegar og hreppsn. Ölfus- og Hraungerðishr. hins vegar lokuð.

En hreppsn. Sandvíkuhr. taldi þó ekki rétt að leggja árar í bát. Tók hún því að búa málið í hendur Alþingi og leitaði aðstoðar herra Jónas Guðmundssonar, eftirlitsmanns sveitarstjórnarmálefna, um samningu frumvarps um málið, er lagt skyldi fyrir Alþingi. Átti hann fund með hreppsnefndinni í því skyni. Var þar ákveðið í aðaldráttum, hvernig frumvarpið skyldi vera.

Er frumvarpið um sameiningu Selfossbyggðar í eitt hreppsfél. var fullgert, lagði hreppsnefndin það fyrir almennan hreppsfund, og var það samþykkt þar með samhljóða atkvæðum.

Þannig undirbúið lagði hreppsn. Sandvíkurhrepps frumvarpið fyrir sýslunefnd Árnassýslu til umsagnar og meðmæla.

Á aukafundi sýslunefndar Árnassýslu, sem haldinn var þann 29. okt. s. l., var mál þetta tekið fyrir og um það gerð eftirfarandi samþykkt:

„Út af erindi hreppsnefndar Sandvíkurhrepps, dags. 23/10 1945, lýsir sýslunefnd yfir því, að hún telur á rökum reista kröfu hreppsnefndarinnar um sameiningu þorpsins á Selfossi, byggðarinnar í Helli og hverfisins við MBF í eitt sveitarfélag.

Hins vegar telur sýslunefndin undirbúningi málsins ábótavant, og leggur nefndin til, að sveitarstjórnirnar reyni að ná samkomulagi um öll atriði málsins, áður en því er lengra haldið.

Felur sýslunefndin oddvita sínum að kalla viðkomandi sveitarstjórnir saman til viðræðu um málið.“

Hinn 6. nóv. kvaddi sýslumaður Árnassýslu hreppsnefndir Hraungerðishrepps og Ölfushrepps á fund ásamt hreppsnefnd Sandvíkurhrepps, og náðist ekki samkomulag um skiptingu milli nefndanna, og var þá sýnt, að ekki var önnur leið til en leita aðstoðar Alþingis um lausn þess.

Þar sem hreppsnefnd Sandvíkurhrepps á fremur óhæga aðstöðu um að fylgja

málinu eftir, hefur hún samþykkt að leita aðstoðar eftirlitsmanns sveitarstjórnarmálefna, hr. Jónasar Guðmundssonar, um að fá málinu komið á framfæri við Alþingi.

Selfossi, í nóvember 1945.

F. h. hreppsnefndar Sandvíkurhrepps.

Björn Sigurbjarnarson,
oddviti.

Fylgiskjöl.

1. **Fundargerð** sameiginlegs fundar með hreppsnefndum Hraungerðishrepps og Sandvíkurhrepps.

Ár 1945, þriðjudaginn 6. nóv., kl. 4 e. h., komu hreppsnefndir Sandvíkurhrepps og Hraungerðishrepps saman á fund í skrifstofu Árnessýslu á Selfossi samkvæmt ályktun sýslunefndarinnar í Árnessýslu frá 29. okt. s. l.

Nefndarmenn voru allir mættir, að undanteknum Ólafi Ögmundssyni í Hjálmholti, Hraungerðishreppi.

Til umræðu var frumvarp til laga um sameiningu Selfossbyggðar í eitt hreppsfélag, samið af hreppsnefnd Sandvíkurhrepps.

Hreppsnefnd Hraungerðishrepps lýsti yfir því, að hún væri alls kostar ósamþykkt öllum breytingum á mörkum hreppsins, en hreppsnefnd Sandvíkurhrepps lýsti yfir því af sinni hálfu, að hún héldi fast við efni frumvarpsins. — Hins vegar komu hreppsnefndirnar sér saman um, að hvor nefnd skyldi tilnefna 2 menn til þess að undirbúa sameiginlega samninga um öll atriði, sem málið varða, ef frumvarpið verður að lögum.

Selfossi, 6. nóvember 1945.

Björn Sigurbjarnarson, Gisli Jónsson,
oddviti Sandvíkurhrepps. oddviti Hraungerðishrepps.

2. **Fundargerð** sameiginlegs fundar með fulltrúum frá hreppsnefnd Ölfushrepps og hreppsnefnd Sandvíkurhrepps.

Ár 1945, miðvikudaginn 7. nóv., kl. 4 e. h., komu saman á fund í útibúi Landsbankans á Selfossi hreppsnefndarmennirnir Hermann Eyjólfsson oddviti og Halldór Gunnlaugsson kaupm., úr Ölfushreppi, og Björn Sigurbjarnarson oddviti, Sigurður Ó. Ólafsson kaupm. og Arnbjörn Sigurgeirsson kaupm., úr Sandvíkurhreppi.

Til umræðu var frumvarp til laga um sameiningu Selfossbyggðar í eitt hreppsfélag, samið af hreppsnefnd Sandvíkurhrepps.

Hreppsnefndarmenn Ölfushrepps lýstu yfir því, að þeir yrðu, samkv. samþykkt almenns hreppsfundar, að vera á móti öllum breytingum á mörkum hreppsins, en hreppsnefndarmenn Sandvíkurhrepps lýstu yfir því af sinni hálfu, að þeir héldu fast við efni frumvarpsins. Hins vegar komu hreppsnefndarmennirnir sér saman um, að hvor hreppsnefnd skyldi tilnefna tvo menn til þess sameiginlega að undirbúa samninga um öll atriði, sem málið varða, ef frumvarpið verður að lögum.

Selfossi, 7. nóv. 1945.

Hermann Eyjólfsson. Björn Sigurbjarnarson.

3. **Bréf** eftirlitsmanns sveitarstjórnarmálefna til félagsmálaráðherra.

Í aprilmán. sl. leitaði hreppsn. Sandvíkurhr. í Árnessýslu aðstoðar minnar um það, á hvern hátt bezt yrði að því unnið að sameina í eitt sveitarfélag þá byggð, sem nú er að vaxa upp í þeim hreppum, sem mætast við Ölfusárbrú.

Hreppar þessir eru Sandvíkurhreppur, þar sem aðalbyggðin er enn þá, Hraungerðishreppur og Ölfushreppur.

Eftir að hafa átt fund með hreppsnefnd Sandvíkurhrepps og setið sameiginlegan fund með henni og hreppsnefnd Ölfushrepps og eftir að hafa fengið þá vitneskju, að hreppsnefnd Hraungerðishrepps hefði neitað að ræða málið við hreppsnefnd Sandvíkurhrepps, var mér það ljóst, að mál þetta yrði ekki leyst án aðgerða Alþingis. Það er of viðkvæmt á ýmsa lund til þess það verði leyst með samkomulagi heima í héraði, eins og bezt sést líka af samþykkt sýslunefndar Árnassýslu og fundargerðum þeim, sem teknar eru sem fylgiskjöl með frumvarpinu.

Ég tel, að alveg óhjákvæmilegt sé að sameina byggðina á Selfossi í eitt sveitarfélag. Þarf þar litlu við að bæta þau rök, sem fram koma í greinargerð hreppsnefndarinnar. Selfosbyggðin er nú í mjög örum vexti, og virðist svo sem þar muni á næstu árum vaxa upp mjög stórt kaupþún. Er það mín skoðun, að því fyrr sem það spor er stigið að sameina byggðina þar í eitt sveitarfélag, því betra sé það fyrir alla, sem hlut eiga að máli.

Samkvæmt þessu vil ég hér með f. h. hreppsnefndarinnar fara þess á leit við yður, hr. félagsmálaráðherra, að þér hlutizt til um, að frumvarp það, er hér með fylgir, fáiast lagt fyrir Alþingi það, er nú situr, því að æskilegast væri, að skiptin gætu farið fram nú um áramótin, ef af þeim á að verða.

Virðingarfyllt,

Jónas Guðmundsson.